



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՀԱՆՐԱՅԻՆ ԾԱՌԱՅՈՒԹՅՈՒՆՆԵՐԸ ԿԱՐԳԱՎՈՐՈՂ ՀԱՆՁՆԱԺՈՂՈՎ
Ո Ր Ո Շ ՈՒ Մ**

-- մարտի 2024 թվականի N°-Ա

**«ՀԱՅԱՍՏԱՆԻ ԷԼԵԿՏՐԱԿԱՆ ՑԱՆՑԵՐ» ՓԱԿ ԲԱԺՆԵՏԻՐԱԿԱՆ
ԸՆԿԵՐՈՒԹՅԱՆԸ ՏՈՒԳԱՆԵԼՈՒ ՄԱՍԻՆ**

Հաշվի առնելով, որ՝

- 1) Հայաստանի Հանրապետության հանրային ծառայությունները կարգավորող հանձնաժողովի (այսուհետ՝ Հանձնաժողով) իրականացրած՝ 2023 թվականի 1-ին ու 2-րդ եռամսյակների ընթացքում «Հայաստանի էլեկտրական ցանցեր» փակ բաժնետիրական ընկերության (այսուհետ՝ Ընկերություն) կողմից սպառման համակարգերի՝ բաշխման ցանցին միացման գործընթացի վերլուծության արդյունքում պարզվել է, որ մի շարք դեպքերում չեն պահպանվել սպառման համակարգերն էլեկտրական ցանցին միացման գործընթացը կարգավորող իրավական ակտով՝ Հանձնաժողովի 2019 թվականի դեկտեմբերի 25-ի N°523-Ն որոշմամբ հաստատված՝ էլեկտրաէներգետիկական շուկայի բաշխման ցանցային կանոններով (այսուհետ՝ Կանոններ) սահմանված ժամկետները,
- 2) հիմք ընդունելով «Վարչարարության հիմունքների և վարչական վարույթի մասին» օրենքի 30-րդ հոդվածի 1-ին մասի «բ» կետը՝ Հանձնաժողովը 2023 թվականի հոկտեմբերի 6-ից Ընկերության նկատմամբ հարուցել է վարչական վարույթ՝ Կանոններով սահմանված պահանջների հնարավոր խախտման փաստի ուսումնասիրության նպատակով, որի վերաբերյալ Ընկերությունը ծանուցվել է Հանձնաժողովի նույն օրվա N°ԳԲ/34.3-Ղ4-2/3834-2023 գրությամբ,
- 3) վարչական վարույթի շրջանակում 2023 թվականի նոյեմբերի 20-ի N°Ե-1818-23 գրությամբ ներկայացրել է իր պարզաբանումները, մասնավորապես՝

Կանոններով սահմանված ժամկետների չպահպանումը պայմանավորելով բնակիչների կողմից միացմանն ուղղված աշխատանքների խոչընդոտմամբ, դիմող անձանց կողմից դիմումներից հրաժարմամբ, դիմող անձանց սպառման համակարգերն էլեկտրաէներգիայի ընդունմանը պատրաստ չլինելով, դիմող անձանց հետ ժամկետների երկարաձգման համաձայնագրերի կնքմամբ, տեղական ինքնակառավարման մարմինների գործողություններով և այլն,

4) Հանձնաժողովի իրականացրած՝ 2023 թվականի 3-րդ եռամսյակի ընթացքում Ընկերության կողմից սպառման համակարգերի՝ բաշխման ցանցին միացման գործընթացի վերլուծության արդյունքում ևս պարզվել է, որ մի շարք դեպքերում կրկին չեն պահպանվել սպառման համակարգերն էլեկտրական ցանցին միացման՝ Կանոններով սահմանված ժամկետները,

5) հիմք ընդունելով «Վարչարարության հիմունքների և վարչական վարույթի մասին» օրենքի 30-րդ հոդվածի 1-ին մասի «բ» կետը՝ Հանձնաժողովը 2023 թվականի դեկտեմբերի 27-ից Ընկերության նկատմամբ հարուցել է վարչական վարույթ՝ Կանոններով սահմանված պահանջների հնարավոր խախտման փաստի ուսումնասիրության նպատակով: Նշված և 2023 թվականի հոկտեմբերի 6-ից Ընկերության նկատմամբ հարուցված վարույթների ավելի արագ ու արդյունավետ լուծումն ապահովելու համար դրանք, հիմք ընդունելով «Հանրային ծառայությունները կարգավորող մարմնի մասին» օրենքի 32-րդ հոդվածի 1-ին մասը, միացվել են, ինչի վերաբերյալ Ընկերությունը ծանուցվել է 2023 թվականի դեկտեմբերի 27-ի ԳԲ/34.3-Ղ4-2/4977-2023 գրությամբ,

6) Կանոնների 170-րդ կետի համաձայն՝ Կանոնների 162-րդ կետում նշված պայմանագրով, իսկ Կանոնների 166-րդ կետով նախատեսված դեպքում՝ համաձայնագրով նախատեսված կանխավճարի (կառուցապատողի դեպքում՝ միացման վճարի) վճարման օրվանից, բացառությամբ Կանոնների 164-րդ կետում նշված դեպքերի, մինչև դիմող անձին էլեկտրամատակարարման (դրա հնարավորության) ապահովման առավելագույն ժամկետը չի կարող գերազանցել՝

ա. բաշխման ցանցին 0,22 կՎ լարմամբ պարզեցված միացման դեպքում՝ 15 աշխատանքային օրը, բաշխման ցանցին 0,22 կՎ լարմամբ միացման մնացած բոլոր դեպքերում՝ 50 օրը,

բ. բաշխման ցանցին 0,4 կՎ լարմամբ պարզեցված միացման դեպքում՝ 15 աշխատանքային օրը, բաշխման ցանցին 0,4 կՎ լարմամբ միացման մնացած բոլոր դեպքերում՝ 55 օրը,

գ. բաշխման ցանցին 6(10) կՎ լարմամբ միացման դեպքում՝ 90 օրը,

դ. բաշխման ցանցին 35կՎ լարմամբ կամ կառուցվող բազմաբնակարան շենքի կամ կառուցապատվող թաղամասի միացման դեպքում՝ 290 օրը,

7) իրականացված վարչական վարույթի շրջանակում փաստվել է, որ մի շարք դեպքերում խախտվել են Կանոններով սահմանված՝ սպառման համակարգերն էլեկտրական ցանցին միացման ժամկետները, ինչն ուղղակիորեն հանգեցրել է մի խումբ դիմող անձանց (սպառողների) իրավունքների և օրինական շահերի խախտման, իսկ Ընկերության ներկայացրած պատճառաբանությունները բավարար հիմնավորված չեն և չեն կարող հիմք հանդիսանալ նշված խախտումների համար վերջինիս պատասխանատվության չենթարկելու համար: Մասնավորապես, հաշվետու եռամսյակների վերջի դրությամբ Ընկերության գործունեության արդյունքում.

ա. 1-ին եռամսյակի արդյունքներով 804, 2-րդ եռամսյակի արդյունքներով 2675, 3-րդ եռամսյակի արդյունքներով 476 սպառման համակարգեր Կանոններով նախատեսված ժամկետներում միացված չեն եղել բաշխման ցանցին,

բ. 1-ին եռամսյակի արդյունքներով 1729, 2-րդ եռամսյակի արդյունքներով 3918, 3-րդ եռամսյակի արդյունքներով 2333 դեպքերում սպառման համակարգերն էլեկտրական ցանցին են միացվել Կանոններով նախատեսված ժամկետների խախտմամբ,

և հիմք ընդունելով «Էներգետիկայի մասին» օրենքի 42-րդ հոդվածի 1-ին, 6-րդ մասերը և «Հանրային ծառայությունները կարգավորող մարմնի մասին» օրենքի 19-րդ հոդվածի 2-րդ մասը՝ Հանձնաժողովը **որոշում է.**

1. Կանոնների 170-րդ կետով սահմանված պահանջների խախտման համար Ընկերությանը տուգանել 20 000 000 (քսան միլիոն) դրամ գումարի չափով:
2. Ընկերությանը՝
 - 1) սույն որոշումն ուժի մեջ մտնելու պահից մեկամսյա ժամկետում որոշման 1-ին կետով նախատեսված գումարը 900005242327 հաշվեհամարով փոխանցել Հայաստանի Հանրապետության պետական բյուջե.

- 2) սույն որոշումն ուժի մեջ մտնելու պահից երկշաբաթյա ժամկետում Հանձնաժողով ներկայացնել էլեկտրական ցանցին միացման ժամկետներում չմիացված սպառման համակարգերի՝ էլեկտրական ցանցին միացմանն ուղղված Ընկերության ձեռնարկելիք քայլերի վերաբերյալ տեղեկատվություն:
3. Սույն որոշումն ուժի մեջ մտնելու պահից երկամսյա ժամկետում կարող է բողոքարկվել Հանձնաժողով կամ Հայաստանի Հանրապետության վարչական դատարան, և դրա բողոքարկումը չի կասեցնում որոշման գործողությունը կամ կատարումը՝ բացառությամբ «Հանրային ծառայությունները կարգավորող մարմնի մասին» օրենքով նախատեսված դեպքերի:
4. Սույն որոշումը սահմանված ժամկետում կամովին չկատարելու դեպքում ենթակա է հարկադիր կատարման «Դատական ակտերի հարկադիր կատարման մասին» օրենքով սահմանված կարգով:
5. Սույն որոշումն ուժի մեջ է մտնում Ընկերությանն օրենքով սահմանված կարգով իրազեկելուն հաջորդող օրվանից:

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՀԱՆՐԱՅԻՆ
ԾԱՌԱՅՈՒԹՅՈՒՆՆԵՐԸ ԿԱՐԳԱՎՈՐՈՂ
ՀԱՆՁՆԱԺՈՂՈՎԻ ՆԱԽԱԳԱՀ՝**

Գ. ԲԱՂԱՄՅԱՆ

ք. Երևան
-- մարտի 2024թ.